

Da ki phew tylli ki iing ki sem pynjulor ka 'er-iong ha khappud Block II ha Ri Bhoi



Ki iing kiba la shah pynjulor ha ka eriong ha ka Shnong Ummat ha Block II ha Ri Bhoi District/(Dur Mawphor)

Nongpoh, Īaiong 01: Da ki phew tylli ki iing ki sem ha ka thain khappud Block II ha Ri Bhoi ki la shah punjulor ha ka eriong kaba la wan lynshop ha ka janmiet Sngi U Blei kumba ha ka por 4 baje janmiet. Kumba la ioh lum jingtip la ong ba kane ka eriong bajur ka la lynshop ym tang ia ki iing ki sem ha katei ki thain khappud Block II bad danki phew tylli ki iing ha ka thain Jirang ruh ki iing ki sem ki la shah punjulor bad ha kiwei kiwei ki bynta jong ka dong Ri Bhoi. Haba phai sha ka jingjia ha ka thain Block II bad hap ha ka Raid Nongtung ha Ri Bhoi, ki lai tylli ki Shnong ki la shah kthah bha ba kynthup ia ka Shnong Ummat I, Ummat II bad ka Shnong Nongder ha kaba 28 tylli ki iing ki la

shah punjulor ha ka eriong emgit ha katei ki 3 Shnong. Halor kane ka jingjia ba sngewsih bun ruh ki longiing ki la kylla khlem iing khlem sem ha kaba katei ka eriong bajur ka la wan ban punjulor ia ki iing ki sem bad baroh ki jingdon jingem jong ki hapoh ki iing ki sem. La ong ruh ba kane ka eriong ym tang ba ka punjulor ia ki iing ki sem, hynrei bun ki jingthung jingtep ruh ki la jolur ba la don ruh ka jingap phria ha ka thain Ri Bhoi. Haba ioh ban ia kren bad u Bah Blikshon Sohtun, President ka Synjuk ki Rangbah Shnong Border Area ka Raid Nongtung, u la ong ba kane ka jingwan lynshop kynsan ka eriong ka la kthah shisha ia kiba bun ki Longiing longsem ha katei ka thain bad ki la kylla long khlem iing khlem sem ba ka

eriong ka la pynjot pynpra ia ki iing ki sem jongki. Ha kaba ia dei bad kane ka jingjia kum u nongialam katei ka thain u la pynpaw ka jingsngewkha ban ioh ba ki longiing ki la shah kthah jur bad don ruh kiba la hap ban wad jaka riehtngen shipor namar ba ka iing jongki kam long shuh ban shong ban sah na ka jingwan lynshop katei ka eriong bajur. Namar kata na ka liang ka Synjuk bad ki nongialam Shnong ki la buh ia ka jingkyrpad sha ka bor sorkar ba kin phah ban wan jurip mardor ia ki longiing kiba shah kthah bad ha kajuh ka por ban thaw lem ia ki lad jingiarap na ka sorkar sha katei ki lanot kiba la shah kthah jur ha katei ka eriong, u la bynrap.

Kum u biskot dei ban pur kylleng da kaba skhem ha la ka tynrai : Sahitbor Diengngan

Nongstoiñ, Īaiong 01: Hadien ki bun phew tylli ki snem naduh ba la seng ia ka skol St Mary's ha ka shnong Maweit kaba dei kawei na ki shnong kaba dang sahdién ha ka thain jong ka West Khasi Hills District, ha ka sngi nyngkong jong ka taiew katei ka shlem ka la ioh ban lum lang ia ki khynnah samla kiba la pass bad kiba dang ia bteng ki jingpule ha katei ka shlem kumjuh ruh ia ki nonghikai kiba rim kum ka jingiaknynduh lang ia kaba la tip ruh kum ka Alumni Gathering.

Ha kane ka sngi la ioh ruh ban plie paidbah biang sa shisien ia ka ling skol barim kaba la ioh ban pynkylla noh mynta tang sha ka primary. Katei ka Shlem ka dei kaba la seng naduh u snem 1992 lyngba ka kynthun I Sister Helen bam kwai ha iing u Blei bad mynta ka la don la ka iing paka kaba heh bad kaba bit kaba biang haduh class X.

Ka dei ruh kawei na ki skol kaba la pynmyntoi shibun ia ki nongshong shnong jong katei ka thain, kaba la sei ruh bun ki soh kynthup haduh 2 ngut ki nongiasaid ain, 17 ki shipai bad pulit, 30 ngut ei ei ki nonghikai kynthup kiba hikai ha ki skol sorkar, ki Nurse, ki Missionary, kiba treikam sorkar bad kiwei kiwei.

U bah Sahitbor Diengngan Branch Manager ka HDFC Bank Nongstoiñ, u la long u kongsan ryngkat u bah Orius Thongni kum u symbud kongsan, nador u Liavi David Principal ka St. Mary's bad kiwei kiwei ki riew rangbah jong ka thain. U kongsan haba ai jingken u la ong dei namar ki nonghikai mynshuwa ba la long kumne kumba long mynta. Kumta ka dei ka kamram ki khynnah Alumni ban wad ia la ki nonghikai kiba la pynlong ia ka mynta. U la ong ruh ban kymnaw ruh ban ym klet ia la ka tynrai kum u jingthung Biskot ban pur kat shaba poi ban soh tangba dei ban tip ia la ka tynrai hangno ka don.

6 bad 7 tarik u Īaiong ka Shad Sukra ka Seiñ Raij Jowai



Jowai, Īaiong 01: Ka Seiñ Raij Jowai kumba long manla u snem kan pynlong iaka 'Shad Sukra' ka ban sdang haka 6 bad pynkut haka 7 tarik u Īaiong, 2024 kane ka Shad Sukra ka long shi bynta ka jinganguh ia ka mei mariang hashwa ban leit hiar rep sha ki hali ki pynthor.

Ha kane ka snem yn wan iadonlang da ki wahah wasian jong ki 12 tylli ki dong, ki kyntoid, kynthup ia ka Sengtyllilang jong ka Seiñ Raij Ummulong bad Seiñ Raij Shillong. Na ka liang u Vice Chancellor jong ka skol bah NEHU un long kum u kongsan, ha ryngkat ka kong Silbi Passah kaba la ioh ia ka Padma Shri award nador kiwei kiwei de.

Ha ka por mynstep 10 waje jong ka 7 tarik kan don ka jingthang iaka sharak ha Mynkoi Pyrdi longpiah nangta kin leit sha madan Biar ka Blai bad leit mih sha lawmusiang ban pynlong ka jingshad Sukra ha ryngkat ki riam tynrai. Katba ha ka por janmiet kan don ka shad "per syntu pyllah" ha kaba ki dong bapher bapher kin iashim bynta lang.

U Chairman ka Arts & Culture ka Seiñ Raij Jowai ma Chandlok Dkhar ula ong ia ka Shad Sukra la ju pynlong naduh ki por ki longshwa manshwa ha ryngkat ka niam ka rukum kaba don shwa ia ka Thoh Lyngdoh.

Ula ong lyngba ka riam ki beit jong ki nongiashim bynta ha ka Shad Sukra ka lah ban pynpaw pyrthei iaka jingriew spah ka riti dustur la jong.

Ha kane ka Shad Sukra haka sngi nyngkong 6 tarik kan don ka jinglehakai Drama ban pynpaw pyrthei ia ki sap ki phong ia kaba yn pynlong ha Tpep-Pale Jowai.

Ka phang jong kane ka Shad Sukra mynta u snem ka ong "kiba tip ban kohnguh ia ki adong Blei ka long ka luti ka jingsuk ha sla pyrthei". Ka Seiñ Raij Jowai ka kyntu kumjuh ia ki paidbah ban wan biang por haka step jong ka 7 tarik ha kaba yn don ki jingken na ki riew rangbah bad ki jingshad bapher bapher.

Na ka bynta ka MP ilekshon 2024, wan jngoh ki EO ha South West Khasi Hills District



Mawkyrwat, Īaiong 01: Ki nongkhmih ne ki Expenditure Observers (EO) na ka bynta ka ilekshon sha ka Lok Sabha ha ka ban sa long ha une u bnai na ka bynta ka 1- Shillong (ST) Parliamentary Constituency ba kynthup ia u Satyapal. S. Meena, IRS bad u Kamlesh Kumar, IRS mynta ka sngi ki la wan jngoh ia ka South West Khasi Hills District, Mawkyrwat ryngkat ka jingpynlong jingialang ha kamra jong u District Election Officer, Mawkyrwat ban khmih bniah ne pynkreh ia ka jingtreikam jong ki komiti bapher bapher na ka bynta ka ilekshon Lok

Sabha Parliamentary Elections, 2024. Ha kane ka jingialang, u Satyapal. S. Meena, IRS u la ai ka jingbthah kaba shai ha kaba ia dei bad ki bynta ne ki kam ba dei ban leh ha kaba ia dei bad ka kynthun ba dei peit ia ka Expenditure Monitory ha kaba u la kyrpad ia u Assistant Expenditure Observer (AEO) ban pynbit pynbiang ia ki report ha ka por ba biang. Ha kane ka sngi ka la don ruh ka jingiyaphylliew bad ki Nodal Officers jong ki kynthun bapher bapher ha kaba ia dei bad ka jingpynkreh bad ka kam jong ki kynthun ba dei peit ha kane ka ilekshon kum ban peit ia ki jingpyndonkam pisa, kyiad

namar ka ain ne ki hukum ka Model Code of Conduct (MCC) bad ka jingpynlut jong ki kyrtong bad ki party bapher bapher. U la ong ruh ba ka donkam na ka bynta kine ki kynthun ban iathuh ne pynyip ha u Deputy Commissioner ne Nodal Officer lada don kano kano ka jingpynkheini ia ka MCC lane kino kino ki jingeh ba ki ia kynduh. Ha kane ka jingialang la iadonlang u bah T. Lyngwa, IAS, District Election Officer, South West Khasi Hills District, u bah L.T. Tariang, MCS, Assistant Returning Officer (ARO), South West Khasi Hills District bad kiwei.

Julor 68 ki longiing na ka jingwan lynshop u phria ha ka thain Warsan Lyngdoh



Ki tin tap iing kiba la shah pynjulor ha u phria ha ka thain Warsan Lyngdoh/ (Dur Mawphor)

Mawkyrwat, Īaiong 01: Ka long kaei kaei ka jingduh nong kaba khraw namar da ka jingwan jong 'eriong 'erlang tharai ha ka miet jong ka 31 tarik u Lber, 2024 kiba bun tylli ki longiing ki la shah kthah bad shah pynjulor.

Ha ka tyllong khubor ba la ioh lyngba ka ophis jong u District Disaster Management Office

(DDMO), South West Khasi Hills District la iathuh ba ha kane ka jingwan jong ka phria ryngkat ka 'eriong 'erlang tharai ki don haduh 68 tylli ki longiing kiba la shah kthah jur na ka jingshad shoh phria ia ki tnum iing bad 39 tylli pat kiba la shah kthah tang malu mala bad kine ki longiing ki dei ha ka thain Warsan Lyngdoh kiba hap hapoh

jong ka Mawkyrwat Block South West Khasi Hills District.

Shuh shuh la iathuh ba ki shnong kiba la shah kthah na ka jingwan ka 'eriong 'erlang tharai ki long ka shnong Mawjaraini, Nongrim Mawpat, Pynden umjaraini, Umsaw, Nongtynfiaw, New Mawjai, Nongpuiñskei, Mawnore, Mawhiangrnga, Mawkhlaingap, Mawpat, Rangmaw, Mawsaw, Manad, Phlangdiloñi, Wahkaji.

Ha kawei pat ka jingjia, ha kajuh hi ka miet jong ka 31 tarik u bnai Lber, 2024 da ka jingwan u slap bad lyer kaba jur kawei ka skol kaba kyrteng ka Vesto Upper Primary School kaba don ha shnong Rangjadong ka la shah lit noh ki tin sop bad la don ki iing briew bad ki dukan kiba la shah pynjulor malu mala. Shuh shuh la iathuh ruh ba ha kine ki jingjia ym shym la don mano mano ruh ba mynsaw.

Julor jur ki iing ki sem ha thain Ri-Muliang ba lynshop ka 'eriong

Nongstoiñ, Īaiong 01: Da ki phew tylli ki ling bad bun tylli ki Shnong ka thain Ri-Muliang, West Khasi Hills, ki la shah kthah jur ha ka eriong emgit kaba wan ban lynshop kynsan kynsan ha ka janmiet sngi U Blei ka 31 tarik Lber 2024.

Kane ka eriong kaba la wan ha ryngkat u slap u ba jur, ka la pynjulor buh eh ha ka thain Langpoh, Tynghor, Umyiap bad kiwei kiwei ki shnong ba marjan. Ki khubor ki iathuh ruh ba ka eriong ka la pynkhylleng ruh ia ki post bording bad ki dieng ki siej ha ka thain. La ong ba ki don ruh katto katne ki briew kiba la mynsaw na kane ka jingjia.

Ha ka jingiakren bad u President ka HYC Ri-Muliang Pylun samla Distarbor Wanniang, u la ong ba ka seng ka dang pyrshang ban lum jingkheini mynta ia ki jingpynjulor jong kane ka eriong ha ka thain baroh kawei.



Ka iing ba ka shah rat ka tnum ha ka thain Ri Muliang. (Dur Mawphor)

U la iathuh ruh ba tang ha ka shnong Tynghor, ki la don haduh 15 tylli ki ling kiba la shah pynjulor bad shah jynrat ka tnum ha kane

ka eriong. Kumta ym lah satia ban tip lut ia ka jingshad pynjulor jong ki iing ki sem ha kiwei kiwei pat ki shnong ba marjan.

Sha ka sorkar kyrpad u MLA Jirang ban pynsted ki lad jingiarap sha ki lanot eiriong ha thain Jirang

Nongpoh, Īaiong 01: Kumba bun tylli ki longiing ha ki shnong ba hap ha ka Jirang Constituency ki la shah kthah jur bad don ruh kiba la kylla khlem iing khlem sem na ka jingwan lynshop ka eriong bajur hynnin ka janmiet jong ka sngi u Blei, u MLA ka Jirang Constituency, u Bah Sosthenes Sohtun u la phah ia ka jingkyrpad kaba jur sha ka sorkar jylla ba kan pynsted ia ki lad jingiarap na ka bynta kito ki longiing kiba la shah kthah jur.

Kum ban pynkynmaw, hynnin ka janmiet kiba bun ki shnong ba hap ha ka Jirang C&RD Block ki la shah kthah jur ha ka eriong, kaba dei hadien ba ka eriong bajur ka la wan ban lynshopki ban pynjulor naduh ki iing ki sem bad ruh wat ki jingthung jingtep jong kiba bun tylli



U Bah Sosthenes Sohtun MLA ka Jirang Constituency ha Ri Bhoi. (Dur Mawphor)

ki shong ha ka thain Jirang. Haba la ia kren bad ki Nongtho Khubor, u MLA ka Jirang u Bah Sosthenes Sohtun u la pynpaw ia ka jingsngewkha kaba jur halor katei ka jingjia ba sngewsih ba ka eriong emgit ki la wan ban lynshop naphang ia ki iing ki sem bad ruh ki jingthung jingtep kaba la

long ka jingduhnong kaba khraw ia kito ki lanot ba la shah kthah bad kaba kham sngewkha ka long ba la don ruh ki longiing kiba la shah kthah jur ha kaba ki la hap ban riehtngen shipor ha ki iing Dorbar bad ki skol, kaba dei hadien ba ka eriong ka la pynjulor ia ki iing ki sem jongki.

U la iathuh ruh da ki

phew tylli ki shnong kiba la shah kthah hapoh ka Jirang Constituency kiba kynthup kum ka shnong Pamumsylliang, Umsahlini, Rani, Gonpati, Jalpaham, Matang, Jirang, Umsohpai bad kiwei kiwei ki shnong kiba la pyntip bad kiba la ioh ban ia kren lyngba ki telephone.

U la pynpaw ruh kaba sngewkha ka long ym tang ba ka eriong ka la pynjulor lut ia ki iing ki sem bad ka eriong ka la pynjulor naduh ki diengkwai, ki diengiri (rubber) bad kiwei kiwei ki jingthung jingtep kiba la kthah shisha ia ki longiing kiba la ngat ha kane ka lanot eriong.

Kum u Nongmikhmat paidbah u la iathuh ruh naduh hynnin ka sngi tang mar ia ioh jingtip u la dep ban kren naduh u BDO ka Jirang Block C&RD Block kiba la phah ia ki briew ban

leit jurip ryngkat bad ma u kum u Ophisar bad ruh u la kren sha u Deputy Commissioner ka Ri Bhoi ba un shim khia khamtam ban pynpoi ia ki lad jingiarap sha kaba kham kloï sha kito ki lanot kiba la shah kthah jur.

Shuh shuh, u la ong ruh namar ka jingsngewkha kaba jur halor kane ka jingjia ba sngewsih ia kiba bun ki longiing longsem, kum u nongmikhmat paidbah u la pynyip ruh sha u Symbut myntri rangbah ka jylla, u Bah Prestone Tynsong ba ka sorkar jylla kan pynsted ban pynpoi ia ki lad jingiarap (Relief Fund) sha kito ki longiing ba shah kthah jur bad ruh ba ka sorkar kan pyrkat kyrpad ba kan nym kthah ia kito ki longiing kiba la duh ia ki iing ki sem na ka jingwan lynshop katei ka eriong bajur, u la bynrap.